

Ataatsimiinnerup ammarneqarnera

(Inatsisartunut sivisunerpaamik ilaasortaasimasoq)

Inatsisartunut qinigaarlaani sivisunerpaamik ilaasortaasimasutut Inatsisartunut ilaa-sortat 2009-mi Inissitsiterluni Ataatsimiinnissamut uummammit tikilluaquakka.

Aallarniutigalugu kingumut qivialaanngitsoorumanngilanga. Tullianik tallimanngorpat ataatsimiittarfik manna ukiuni 25-ini suliffigisimassavara. Suleqatigisimasakka amerlaqisut inuiaqatigiinni suli suleqataapput. Ukuli taama angusaqartigaluta ullumikkut killiffitsinnik pilersitseqataasimasut inuusugut uagut akornatsinniikkunnaarsimapput:

Niels Carlo Heilmann, Lars Chemnitz, Aage Hammeken, Niels Nielsen, Anguteeraq Davidsen, Jonas Danielsen, Frederik Rosbach, Ingvar Høegh, Bjarne Kreutzmann, Emil Abelsen, Agnethe Davisen, Knud Sørensen, Moses Olsen aammalu Sofus Joelsen. Suleqatigisimanerat qujamasullunga tanngassimaarlungalu eqqaasarpara.

Inatsisartut Naalakkersuisullu pillugit Inatsisartut inatsisaanni § 1 naapertorlugu Inatsisartunut ilaasorta q sivisunerpaamik ilaasortaasimasoq, arlallillu siviloqatigimmik ilaasortaasimappata taakkunannga angajulleq, pisussaatitaavoq Inatsisartut Inissitsiterlutik Ataatsimiinnissaannut Inatsisartut ataatsimiigiaqqussallugit.

Taamatut atuunera atorlugu Inatsisartut ataatsimiigiasimavakka. Ulloq 10. juni 2009 qinersinerup ingerlanneqarnerani qinersinerup inernerata qinersinermut ataatsimiititaliamit naatsorsorneqarnera tunngavigalugu ataatsimiigiasineq pivoq.

Takusinnaavara ilaasortat tamangajammik matumani inissitsiterluni ataatsimiinnissap aallartinnissanut tikissimasut, taamaalillunilu Inatsisartut qinigaarlaat tamakkiisumik aalajangiisinnaassuseqartut.

Ulloq 2. juni ukioq manna qinersinermi Inatsisartunut siusinnerusukkut ilaasortaasimasut ilaat ilaasortanit nutaanit 12-iusunit taarserneqarsimapput. Taamaammatt Inatsisartunut ilaasortat nutaat taakku immikkut tikilluaqqumavakka. Aamma ilisarisimariikkat tikilluaqqungaarpakka. Tamassinnut atuuttumik oqaatigis-savara qinigaaffimmi aallartittumi pitsaasumik anguniagaqarfiusumillu suleqati-giinnissatsinnut qilanaarama.

Ilisimatitsissutigineqassaaq Inatsisartut sinnerlugit Ataqqinartorsuaq Dronning Margrethe Aappaat, qallunaat naalakkersuisui, Folketingi, Islandip Altingia Savalimmiullu Lagtingiat inuulluaqqusummik nassikkakkit.

Taamaalillugu nalunaarutigaa Inatsisartut Inissitsiterlutik Ataatsimiinnerat 2009 ammarneqartoq.